

12 AUG 2001

Sukan-Kart

JEPUN MENJUARAI PIALA PERDANA MENTERI

LANGKAWI, 12 Ogos (Bernama) -- Pasukan Jepun, La Maree & Splash, muncul juara Kejohanan Kart Indy 40 Enduro Langkawi 2001 merebut Piala Perdana Menteri yang menawar hadiah keseluruhan RM100,000 di Litar Antarabangsa Kart Morac di sini, hari ini.

Ketua pasukan itu Yukihiro Sonoda, 44, berkata ini adalah kejayaan pertama pasukannya sejak menyertai kejohanan itu pada 1999.

Pasukan itu turut dibarisi pelumba muda, Uchida Yasuhiro 25, Taro Shigemasa 27, dan Miyamori Osamu, 25. Dalam penyertaan pasukan itu 1999, mereka menduduki tempat kelima dan pada 2000, menduduki tempat ke-12.

La Maree mencatatkan masa 3 jam 59:48.70 saat untuk menamatkan 197 pusingan bagi menggondol wang tunai RM40,000.

Pasukan itu juga mencatat masa terpantas 1:10.451 saat dalam pusingan ke 59.

Pasukan campuran Malaysia dan Indonesia, Kartmaster, pula menduduki tempat kedua untuk menggondol hadiah RM30,000.

Ng Wai Leong dan Farriz Fauzy, kedua-dua dari Malaysia serta Meckel Ali dan Arya Setyaki dari Indonesia mencatatkan masa 4 jam 00:11.25 saat.

Farriz berkata pasukannya memberi saingan hebat kepada pasukan Jepun tetapi nasib menyebelahi pasukan itu.

Sebuah lagi pasukan dari Jepun, Buova Kart Racing, menduduki tempat ketiga dengan catatan masa 4 jam 00:50.39 saat untuk memenangi RM20,000.

Pasukan Malaysia, Sajibumi, yang dibarisi pelumba muda terdiri Nik Iruwan Izani, Mohd Rohairijaz Mohd Ropin, Aaron Lim Say Joon dan Raja Arfiz Shah Putra hanya mampu menduduki tempat keempat.

"Kami berusaha bersungguh-sungguh, tapi tidak berhasil," kata Nik Iruwan, 16, ketika ditemui selepas perlumbaan itu.

Sebuah pasukan pilihan, Capital Rent A-Car United Kingdom, diketuai pelumba Mark Morisley yang memperolehi petak pertama pada perlumbaan hari ini, bagaimanapun gagal dalam kejohanan itu.

Begitu juga dengan juara bertahan GP3 Malaysia yang diketuai pelumba kebangsaan, Kefli Othman.

Pasukan dari Jerman, Nolsher Audi turut gagal mendapat tempat pada perlumbaan itu.

Sementara itu, Mahathir Ngaau dari Malaysia menjuarai Kejohanan Rotax Max Antarabangsa terbuka di litar yang sama hari ini. Beliau mencatat masa 22:12.24 saat.

Martin Druhan dari Australia menduduki tempat kedua dan ketiga Sinyo Haryanto dari Indonesia.

Sebanyak 26 pasukan termasuk tujuh dari Jepun, Jerman, Singapura, Indonesia, United Kingdom, Itali dan Malaysia menyertai kejohanan itu.

Kejohanan dua hari itu dianjurkan bersama Mofaz Motorsport, Langkawi Motorsport Club (LMC) dan Lembaga Pembangunan Langkawi (Lada) sempena menyambut Hari Kebangsaan.

Presiden LMC Datuk Haji Abdul Halil Mutalib menyampaikan hadiah-hadiah kepada pemenang.

-- BERNAMA

ZI NAK